



UPA2019/055

10.04.19./Peter Olsen

Aasakkt nalunaaquttap atorunnaarsinnissaa suliniutigileqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Justus Hansen, Demokraatit)

Siullermik Justus Hansenip siunnersutaanut pissanganartumut soqutiginarumullu qujanarujussuaq.

Soorlu siunnersuuteqartup tunngavilersuuteqarnermini nammineerluni oqaatigigaa; Aasaanerani nalunaaquttap eqqunneqarsimaneranut tunngaviusimasooq tassalu qaamarngup atorluarneqarneratigut, nukissiuteqarnerup tungaatigut sipaaruteqarnissaq.

Aammattaaq tunngavilersuutigisami ilaani aamma tikippaa, taamanikkut taamatut aliangiisimanermut tunngaviusimasooq ullumikkut pissutsit allannorsimaneratigut allannorujussuaqqasooq, tassalu atortorissaarutitta tungaatigut ima siuarsimatigilersimavugut allaat qangangut nukimmik atutigingikkaluarluta, qanorsuaq innaallagissamik atuisinnaangornikuuvugut, ilaatigut nunatsinni innaallagissamut imermullu akigititaasut assigiittussannorsimanerata kingorna innaallagissamut imermullu aningaasartuutigisartakkatta affaannangorsimanerat pissutigalugu.

Minnerunngitsumillu peerit sipaarnartut kiisalu LED- nik qaammaqquteqarnerup innaallagissamik atuneq malunnartumik millisinnikuuaat aamma qaammaqquteqarneq ataatsimut innaallagissamik atuneq eqqarsaatigalugu annerusumik sunniuteqarneq ajortoq Justus Hansinip tunngavilersuutimi eqqaavaa.

Naluneqanngitsutut EU-mi aamma qanittukkt aaliangertoqaqqammerpoq, aasaanerani nalunaaquttap 2021-miit atorunnaarsikkiartuaarneqarnissaanut tunngasumik. Nunat EU-mi ilaasortaasut akuerissanerlugu akuerissannginnerluguluunniit, nunaminni ataasiakkaani innuttaasunik taasitisisussanngorput, akuersigunillu tassa taava kingusinnerpaamik 2021-mi aasaanerani nalunaaqutaq atorunnaarsinneqarsinnaangortillugu.

Inuit Ataqatigiinniit Justus Hansinip siunnersutaa taperserparput, akuerineqarnissaalu innersuullugu ataatsimiititaliamut susassaartumut ingerlateqqipparput. Taamatut ataatsimiititaliamut ingerlateqqinneranut pissutigaarput, isumaqaratta tassunga tunngatillugu susassaarsinnaasut, attuumassuteqarsinnaasulluunniit kikkut tamaasa suleqatigalugit peqatigalugillu suliap massuma ingerlanneqarnissaa Inuit Ataqatigiinniit pingaartikkatsigu.

Qujanaq

Peter Olsen

Inuit Ataqatigiit

